

Gusseeni

id weer ideen weekka edooson. in idin ideeni, idta taffishoosinnanga firgooson. kutta dirbad gafas weekka tichchagooni, in dirbadta juu eryaallog jaane iyyon – eryaal ishriin girishka – walaa eryaalin geerrog jaantame iyyon. takkon tayyib iyyon. kutta in dirbadin gafaska sokkeda tanynyafin tanynyafin tanynyafin, taachchikan kachchikan eryaala ikkan eryaallogol dirbadta jaaninna iigoosa sokka jigjoosa nogjinnan. ingeentaangoon agar wiirreeddo juwon. ideen wee wiida kaama dirbadi iyyon. takkon dirbadl eryaala iyyon. naasi iigon in dirbadta ikka eryaallog jaane iigoyi? ideen annina iyyon. tayyib ekkire iyyon ay fa jaanechchireeni – in dirbadin gafaska dummeda shongirka fa juu arrateere iigoosagooni ingir noog aamir dawwi weella juu torjooron. baab weellog torjooragoon baabn uwutillog falooson. idtool aagin aagin aagagooni, baabba kokkon. mina, dirbadin shongirka arradeemminnoo? tekkon dirbad weekka uul iddog dummakummunne issan. juu awoo aagikkuug issigishshan ullee man iddidottoon dirbadta dummiso? la. iigatissan, in noog dawwi weera baab weellog torjoora baabn uwutillog falechchon, walaa awwotoon iddog dummo daammun. hayyirdangoosagoon eddig tibil okkirechcha aagin. man ideen zaatutoodi kir iigatiron, ele annengatood immi takkir hayyirdangoos aagi? wallaahi dirbad gafas weekka kaagriigoon ideen wee kir dummechcha shongirka arradeenkummun. in noogka kokkisiigooni uullimmunna issan. iigon: oddoor fa arraten, oddoor noog tan kedekka wiirra. ideen iigatiron: tayyibi hijil an wee in biirra wiirka torjooronaani ayga hijilka juu oosooson. tayyib iigoosa kittitootta oosa shaallog iskiroosa libaaslog sukkooson. biirratoon fala kireffaangoon kittitookka enneda mirooson. takkon falakir hayyirdangoosa aagin. ideen wiida kiragoon issigon: ele annengatoo, immii takkir hayyirdangoos aagi? iigon: ideen weekkon dirbadii sokkechcha shongirka arradeemmuun daffooson, ideen weekkon kir hijil anni in biirra wiirka torjoorona iyyon sukka biirin tuulgoon kaasha hijilka maariss fala kiiriiffaangoon kittituuny anguug ennechcha mirooson. takkon iigatiron tayyib kuttoos noog unna, kitti inga ennokkon aylin, dirbad inga ennokkon aylin. juwagoon iigatiron: kagiddo dirbadta eryaallog jaaninnan daammun, in ideen inni shaammaanya. hikkira? ikka ken taffishalley in ideen inni in jelli tanga adledaagin, dirbadta naayl eryaallog jaani? enaa inna beyyiton ayl ikka fa enjiinnaan adlen umuurka amanteereeni. beyyitooson. shaafa wee hillal diikonon, kutta juu takkoo in idikkonga dukk ettaashshan kir kefennatoon oosoosa, kuchchir kitti tanga idachchatira, gatti tanga kusmijatiragoon wildillinay sokkessan. juzlaan dawwi weekkon kogoshikko kebeekko kaayeekko kadakko ichchikkollog hikkellakir abb iskiroossan. iigoottiron ikkon haddaamille menname aygon baashan ideenne men. ayilon ikka ushikkeega emerjikeega weekka banynyitam. tayyib iyyon. noogil

juzlaanga iskiroosagoon falooshshan. dukkaan dawwi weella juwagoon, ayi baasha filaanna ideenne men issaattoon tenni ayga arradeenen kittil ayga hiilmun aygon in awakka kitti weekkuug merechchalley daal. dukkaann ashriin keelka enne issan. kekka innatoongoon mannatoongoon kekka tan firgisiinga ennehchon koomkir iskira. kiragoon haddaamga iigatiron juzlaanga ekkireya. ingir jeebba ushra mangir jeebba ushra ay juzlaanga kaagmunne iyyon, ir juzlaanga ennakummi, nahaar eshshuumuneel ikka mereda, gelem weekka tiron. tekkon la la la sittii issan, uul ikka aamnir, wallo shongirka ekkir. laala iyyon, asliig an noogiltoon fassiinga baashallon ukkikkan ayga noogiltoon fa oosin. ay baashal ukkimmuunini markechcha daal. tayyib issan haddaamidhan juu idir. haddaam mina iyyon, haddaamissen aydan daarintaangoon ayikka orkikkummuunii ay kinynyinnee ukka fa wessilii? ayl in wilidta inna iskiroosa, degiiga weella inna fa juu kiir. haddaamikko takkonga miroochchagooni man ten jaangedaagekka kaagintaan kashshan. owwol toorintaangoon, kel takka eerechchona iyyon tammii tar wilid gaseekkir maashingafii? tekkon banynyisan: wallaahi yaa sittii in fassiindo walaa kuttakummun walaa onykummun walaa mool tanna juwo daammun. juu guunyoosagoon, laala wilid diyafiina iyyon. kir guunyangoon diyafin. ter wiida aamil elmaaruuf uu walaa wilid innin moollo kachchakummun walaa taffakummun, walaa asliin wilid kuttakummun, issaattoon uu walaa in kitti innin shongirka firgimun, in miyyiteen jeniigoon dummechch walaa billaahi in wildin in dukkaanna diisiinga banynyitam. takkon kittilogolee ay wilidta wiiskiyya iyyon. tekkon yaa bitt ennaas uu takka weekka aayatirkummun, tar noorin diyallog diyon in miyyiteen jeniigoon iin. miniin miyyiteen jeniya iyyon shongirree aydog marsa, taa in haddaamn agka ken koffikeega iiginnan geerka. kittigoon tooyechchon miyyiteen jeni tennigoon ennehchon falagoon noogil juusan. shaafakka tugur tuunyi tanga idachchatiragooni juu kunyiroossan. issigon: neenaa enjiin hikkir adlekka? enjiil ingeennan, ten firgekka enjiil aayinnan. issaattoon in kittikkon aydo diyya, ikkon in miyyiteen jeniig ennehchcha kutta ideen indog juwa barraa barraalog noog inna miniin haasla inekka dambilog geerrog fehmechcha tariin baadta noogil ju. tayyib iyyon. sikkal tanynyafiingooni, shaggaalanchii weekkuuyi aagintaangoon iigatissan yoom tuskog shaggaala weel oddooson jelli uun menjinaani, yoom tuskog uuddan in jellig shogolon. laala iyyon ay shongir mablag weekkoon kaagr walaa eska fa tiigmun. minga kaagii? miyyiteen jeniiga. woon ayga deenchimii? idin weyyookkani, hisaab ingoon fa teer miyyiteen jeni ingoon fa teere iyyon. tichchon. aag shogolingo idli weyyooson. ustag iigatiron: idli weyyoosonaan miyyiteen jeni anga deenchimii! la miyyiteen jeni in an nassiin daammun. ayga miyyiteen jeni anga deenchimiy banynya meskagoon kutta ideendog juwon. jellil inga alag inga alag inga alag illin. ony weel ikka mera maanteel ikka mera ir orgonnee sikkal daaffii? tayyib kutta juu ayga

nalkummuunii, ayga irbimmuuniranga tiig ay fa kiireeni. nogon. ideengon kutta dukki weekka kebeekko kogoshikko, kaayeekko feekkeekko, musiiba inkelleekkollog jangedon. juwagoon man agarra wiiri weeddo jaaba tiigooson. usta wiida kutta juwagoon ele annessitood mina iyyon immii inna gaseekkir maashingoosa aagi, gaajimmi? takkon yaa annengatood iyyon ay aadem gariib weera menne iyyon issaattoon safarafiir. shoortinfiiretuunyi anguul inna daaffiini aadem amiin wee tiroosinnan koo weekka kaareda ingir giriidafiintaan taa meskoosa ingir inna tiigs. takkon woon ayga deenoommi iyyon. takkon woon ay ikka hiddotoon irbeeree ir ayga hiddotoon irbee? takkon mallel aydog iskeennana iyyon. woon ay minn irbeere iddog mallen iskirekka, hiddo ukkisse? takkon man id manna menjikka neenaa iyyon, tar aydog miyyiteen jeniig iskiredaagin. woon faayaad wee kinynyinii sened wee kinynyinii shaahid wee kinynyinnee iddog iskiredaagi? eyyo iyyon, banynyon: ahuun esken og anna taachch ekkir issig. taachchon kirongoon issigon: ir miyyiteen jeniig aydog iskiredaagmii? eyyo. faayaad weellogol iskiroo sened weellogol iskiroo, shaahid weellogol iskiroo? laala iyyon - ustan garadli wiida man ideen shongirka idni lekin diigday daara dummechchinannin. huss iskisse iyyon. ideen banynyon: hussangoon iskironaa hussangoon fa dumminaa? takkon ikka faa tichchinaa? eyyo iyyon. miyyiteen jeniig anga deenche iyyon. sokkekiragoon oomir eddil idachchatiron. erraajilka ibiichchan amaarag aayatirongoon mira daffon. takkon halaas iyyon malleen ikka aag ingir tiren keello maashi ittariig mallenn aag tiren keello halaas amiina menname, tiroosall. tiroosagoon ideen kutta daffon. gallireda juwagoon ayikka merechchon! man miyyiteen jeniigoon oosjon. noog tanna juukangoon id wee ideen tandan wennisdangintaan aagin. in idli wiida aag ideen tanga issigin: issaatta id innon kirkokkan ay fa minga aayse? fa minga aayo iyyon man gussee dawwinkeella juu torjorinnannin. indan wiida id harakag noogil aayongooni juu gusseel torjoron. toora juwon idi. maskaagjiroo, marhaba. dirbad gaalya menonaa? ashriig jaanonaa? eyyo iyyon gaalya menon ashriig jaans dirbadta, laakin ir gaalikka minninay daari? minne iigongoon gaali taa gusseellina iyyon! gussee mina iyyongoon, gussee gaali halaasa iyyon. in gusseenchii unguug wallo dabalechcha juu fa jaanjir. takkon halaas juu jaanch laakin man gussee agreskatti dawwitootta mugoosa ichchikkuug jaanch. la, aslu tar gussee agreskatti dawwilliin an jaanninnanga firgeyi, tallin shongirka fa ekkiiyi. tar gusseeg kutta doorro tawwoo tanga kasse iyyon. kutta kassooson. mangon tuuga awwolog foogintaan aagin, ideengon shaallog foogintaan aagin. kassoosagoon in gusseeg dabalessan. noogin kirrituunyi tenniguugoon dooleshshan. kantiin wee fuutafiingoon, uuuuk woo ere'iis ayga ennede iyyon. kiragoon degooson. torjeshshan. aaginnangoon, in id kantiin kookkon ideen tanga kaagin sigirrogo. in kantiin koonn ideengon jigjon. man id gusseen kookkon jigjon. in kantiin koo wiida man idta dummedon immii

ideen annin jigjikan jigjii? hussan jigjise iyyon. laala iyyon in ken ideen annin jigjikan jigjen sebebba ayga iigaden. takkon ay ikka iigatiyyaa ayiin ken jigjisiinga, eyyo. ideen innin muraafga inellog jigjise iyyon. takkon woon isseni eliin geerra uuga nachchakummunname, walaa uul ikka nalkummunno ir hikkir irbiroo? eliin geerra nachchakummuunintaan irbeere iyyon. ideen innin refiigikkon man sanduuk tan tarkedaagella daaffin, ideen annin refiigikkon in gussee an dabala kaagella daaffin. takkon woon in jellillon marjaarangjikani iyyon. wallaahi noog annin kirrituunyigoon kaagir, miyyiteen jeniigoon kaagir tichcha faloosinnannin. takkon woon aleengookkani iyyon. banynyon: aleengookkan in sigirka budaa tandan ikka fa mugootteer. kagiddo ideen anninig fa neere iyyon, sanduukka ushir furga gallirekkikkangoon id kurked wee burukkintaan daaffin. ushir in sanduukka koffoosagoon baharra kadda idrooson. gusseeg ushir korjekkachchikangoon tallagoon wee daaffin tuun tuul kiddafiintaan gusseeddin dabala baharra idroossan. ideen uwwongaarin gumurkoon mera baharra kadda idrooshshan. taajir banynyon: uugon karam tenniddo shogolagoon genn taabagoon genn simattagoon aa foogir ingon weekka sanduuklog kaagnaa ingon weekka gusseelog kaagnaa. yalla sigirka takka tiroosa taani walaa shogolka fa shogolmun walaa ideenga fa edmunney iigoosa kutta falooson. in id guseen kooyi sigirka mukka kaagintaangooni man ideen takka wessoddog kutta juwon. minaa? jellil inga alag inga alag inga alag illin in banynyisiin malleetooll aleya menon issaattoon iriin geerro aydan nefeymun, ikka fa edall. takka edoosa turbuu turbiyyanga tiigishshan.